

力
科
下
卷
九

幼科證治準繩集之八

脾二

金壇王肯堂宇泰甫輯

瘦樵程永培校

疳

病因

內經曰數食肥令人內熱數食甘令人中滿蓋其病
因肥甘所致故命名曰疳若夫襁褓中之乳子與四
五歲之孩提乳哺未息胃氣未全而穀氣尙未充也
父母不能調將惟務姑息舐犢之愛遂令恣食肥甘
與夫瓜果生冷及一切烹飪調和之味朝飧暮噉漸
成積滯膠固以致身熱體瘦面色痿黃或肚大青筋

蟲痛瀉利而諸疳之證作矣

錢諸疳皆脾胃之病

內亡津液之所作也因大病或吐瀉後醫又以藥吐下致脾胃虛弱亡失津液且小兒病疳皆愚醫之所壞病假如潮熱是一臟虛一臟實而內發虛熱也法當補母而瀉本臟則愈假令日中發潮熱是心虛熱也肝爲心母法宜先補肝母肝實而後瀉心心得母氣則內平而潮熱自愈醫見潮熱妄謂其實乃以大黃牙硝輩諸冷藥利之利既多而不能禁則津液內亡漸成疳也又如癖病發作寒熱飲水脇下有形硬痛法當用藥漸消磨之醫反以巴豆礪砂輩駛藥下

之小兒易虛易實下之既過胃中津液耗損漸成疳
瘦又有病傷寒五六日間有下證以冷藥下之太過
致脾胃虛而津液少卽便引飲不止而生熱也熱氣
內耗肌肉外消他邪相干證變諸端亦成疳病又有
吐瀉久病或醫妄下之其虛益甚津液煩躁亦能成
疳也 小兒病癖由乳食不消伏在腹中乍涼乍熱
飲水不止或喘而嗽與潮熱相類若不早治必成勞
疳以其有癖癥則令兒不食致脾胃虛而發熱故引
飲也飲多卽蕩滌脾胃亡失津液不能傳化水穀其
脉沉細益不能飲食致脾胃虛衰四肢不舉諸邪遂

生羸瘦而成疳矣

楊兒童二十歲以下其病爲疳

二十歲以上其病爲癆疳與癆皆氣血虛憊腸胃受傷致之同出而異名也何者小兒臟腑嬌嫩飽則易傷乳哺飲食一或失常不爲疳者鮮矣疳皆乳食不調甘肥無節而作也或嬰幼闕乳粥飯太早耗傷形氣則疳之根生或三兩晬後乳食稍多過飽無度則疳以傷得或恣食甘肥粘膩生冷鹹醋以滯中脘則疳因積成或乳母寒暄失理飲食乖常喜怒房勞卽與兒乳則疳因母患傳氣而入此非病家不能調適之過乎疳皆脾胃受病內無津液而作也有因吐瀉

之後妄施吐下津液虛竭得之者有因潮熱大下利
無禁約胃中焦燥得之者有因傷寒裏證冷趺太過
渴引水漿變而生熱熱氣未散復於他邪得之者又
有病癖寒熱脇下痛硬或者不能漸與消磨遽以礪
巴峻決津液暴傷得之者此非醫家輕藥壞病之過
乎疳之爲候頭皮光急毛髮焦稀顙縮鼻乾口噤唇
白兩眼昏爛揉鼻擗眉脊聳體黃鬬牙咬甲焦渴自
汗尿白瀉酸肚脹腸鳴癖結潮熱酷嗜瓜果鹹酸炭
米泥土而欲飲水者皆其候也

證候

肝疳亦名風疳亦名筋疳

錢肝疳白膜遮睛筋疳

瀉血而瘦

湯肝疳眼白青眼睛澀癢

聖惠搖頭

揉目流汗偏身合面而臥面色青黃髮竦頭焦筋青
腦熱渾身瘡癬腹中積聚下痢頻多久而不痊轉甚
羸瘦 曾氏曰生眵糞髮際左臉多青或白睛微黃
瀉利夾水或如苔色

心疳亦名驚疳

錢氏面黃頰赤身壯熱

湯氏口

内生瘡 聖惠渾身壯熱吐利無常頰赤面黃胸膈
煩滿鼻乾心躁口舌生瘡痢久不痊多下膿血有時
盜汗或乃虛驚 楊氏小便赤澀五心皆熱 曾氏
齧牙舒舌愛飲冷水喜伏眠於地

脾疳亦名食疳

錢氏面黃腹大食泥土

湯氏脾

疳食不消胃疳多吐

聖惠腹多筋脉喘促氣麤乳

食不多心腹脹滿多啼欬逆面色痿黃骨立毛焦形

枯力劣胸膈壅悶水穀不消口鼻常乾情意不悅愛

暗憎明腸胃不和利多酸臭

曾氏愛食冷物引飲

無度身面俱黃髮稀作穗頭大項小腹脹脚弱間或

釀瀉肌瘦目慢晝涼夜熱不思乳食

錢氏又云肥

疳卽脾疳也身瘦虛黃乾而有瘡其候不一種種異

端今略舉之目澀或生白膜唇赤身乾黃或黑喜卧

冷地或食泥土身有瘡疥瀉青白黃沫水痢色變易

腹滿身耳鼻皆有瘡髮鬚作穗頭大項細極瘦飲水皆其證也 按此言脾疳證候多與餘疳相濫蓋疳爲脾經本病固應兼之

肺疳亦名氣疳

錢氏氣喘口鼻生瘡

聖惠咳嗽

氣逆皮毛乾焦饒涕多啼咽喉不利揉鼻齕甲壯熱憎寒唇邊赤癢腹內氣脹乳食漸稀大腸不調頻頻泄利糞中米出皮上粟生 曾氏鼻下赤爛手足枯細口有腥氣右腮眇白

腎疳亦名急疳亦名骨疳

錢氏腎疳極瘦身有瘡

疥骨疳喜卧冷地

湯氏齒爪黑

聖惠肌骨消瘦

齒齬生瘡寒熱作時口鼻乾燥腦熱如火脚冷如冰
吐逆既增乳食減少瀉利頻併下部開張肛門不收
疳瘡癢痛 曾氏兩耳內外生瘡脚如鶴膝頭縫不

合或未能行牙齒生遲其縫臭爛傳作走馬疳之類
楊五臟疳傷大抵然爾析而論之曰五疳出蟲曰蛔
疳曰脊疳曰腦疳曰乾疳曰疳渴曰疳瀉曰疳痢曰
疳腫脹曰疳勞曰無辜疳曰丁奚曰哺露證狀非一
可不舉宏撮要而條析之乎五疳出蟲者疳傷之源
雖起於乳哺不調然臟腑停積已久莫不化而爲蟲
其蟲或如絲髮或如馬尾多出於頭項腹背之間黃

白或赤者可醫青黑則難療也蛔疳者失乳飯早食
肉太早或腸胃停蓄甜膩化爲蛔蟲皺眉多啼嘔吐
清沫腹中作痛肚脹青筋唇口紫黑搖頭齒癢是也
蛔雖食蟲蟲不可動
從口鼻出者難治脊疳者蟲蝕脊脊身熱羸黃積
中生熱煩渴下痢拍背如鼓鳴脊骨如鋸齒或十指
皆瘡頰齧爪甲是也腦疳者胎中素挾風熱生下乳
哺越常頭皮光急滿頭餅瘡腦熱如火髮結如穗遍
身多汗顙腫頤高是也
臨產多慾亦然易損兒眼乾疳者瘦悴少
血舌乾多啼其病在心目不轉睛乾啼少淚其病在
肝身熱尿乾手足清冷其病在腎聲焦皮燥大便乾

結其病在肺搭口癡眠胃脘乾渴其病在脾總爲五
乾疳是也疳渴者臟中風有疳氣加之乳母恣食五

辛酒麪炙燻使小兒心肺壅熱日則煩渴引水乳食

不進夜則渴止是爾疳瀉者毛乾唇白額上青紋肚

脹腸鳴泄下糟粕是爾

勿用熱藥止之

疳痢者挾受風寒暑

濕或冷熱不調或停積宿滯水穀不聚頻下惡物是

爾疳腫脹者虛中有積其毒與氣交并故令腹肚緊

脹由是脾復受濕故令頭面脚手虛浮是爾

法當磨積調氣

疳勞者潮熱往來五心煩熱手足心及胸前熱而發

瘡盜汗骨蒸嗽喘枯悴是爾或渴而復瀉飲水惡食

肚硬如石面色如銀斷不可活無辜疳者腦後項邊有核如彈按之轉動軟而不疼其間有蟲如米粉不速破之則蟲隨熱氣流散淫蝕臟腑以致肢體癰瘡便利膿血壯熱羸瘦頭露骨高是爾鍼刺破或澣濯膏藥貼兒衣露於簷下爲雌鳥落羽所汚兒着此衣蟲入皮毛亦致無辜之疾兒衣已曬須微火烘之其若手足極細項小骨高尻削體痿腹大臍突號哭胸陷或生穀癥是爲丁奚虛熱來往頭骨分開翻食吐蟲煩渴嘔噦是爲哺露丁奚哺露皆因脾胃久虛不能化水穀以榮血氣故肌肉消鑠腎氣不足復爲風冷所傷

使柴骨枯露亦有胎中受毒臟腑少血致之此皆無
辜種類之疾病而至此不幾殆哉又有小兒久患腎
疳內虛不食甚者天柱骨倒治法當用錢氏地黃丸
加驅疳等劑仍與貼項強筋若不識證謂之五軟非
也天柱骨倒凡有三種有吐瀉日久羸弱成者有肝
膽伏熱面赤唇紅忽變此者有傷寒不及發表成者
是皆風邪入肝以致筋絡舒弛吐瀉者當調胃氣肝
熱者隨輕重以涼肝並與強筋貼項惟傷寒天柱骨
倒者難療故併及之

莊氏家傳小兒二十四候 第一候瀉膿血日漸瘦

是冷熱疳

第二候脚細肚高胸前骨生愛喫泥土

酸鹹日久通身黃時時吐逆下痢腹內疼痛是脾疳

第三候鼻下赤爛愛揉眼兼血痢是肺疳乃因喫

着乘熱物或病後所損心肺加之欬嗽更以服涼冷

藥過多便上熱下冷漸漸昏沉日夜煩哭 第四候

皮虛皺面無顏色身上燥癢心煩 第五候毛髮稀

疎鼻生瘡是肺疳 第六候頭生瘡毛髮稀焦是肝

疳 第七候牙變黃赤不定是腎疳 第八候頭髮

焦乾鼻下瘡生是肺疳 第九候咬指甲毛髮作穗

四肢沉重是心疳 第十候肚上筋生齒蟲蝕是骨

槽疳

第十一候吐逆腹脹是胃疳又名玃疳 第

十二候齒斷臭爛面無顏色心不思食是脾疳又名

口疳

第十三候愛合面臥多睡如醉腹脹氣急蓋

是因曾喫生肉如此腹內有蟲是心脾疳 第十四

候鼻內乾痛口中臭氣齒根有鮮血是肝肺疳 第

十五候脚細肚高并肚上有青脉是脾疳 第十六

候非時生瘡愛喫冷水是熱疳 第十七候皮膚上

生粟子糞中米出是脾冷疳 第十八候氣滿腹脹

及口乾是心胃疳 第十九候愛餐生米麵炭麩瓦

是脾胃疳 第二十候揉鼻揩眼及咬指甲愛飲水

疳

幼科八

竹葉

是肝渴疳

第二十一候多寒熱愛臥不起是骨熱

疳

第二十二候愛飲水眼目不開是肝疳 第二

十三候肌體或熱或涼發渴無時是急疳 第二十

四候齒斷黑唇懶開開則赤是心疳積熱

五疳
可治

聖惠凡小兒疳在內眼澀腹脹痢色無常或如泔涎

日漸羸瘦此候可療若鼻下赤爛自揉鼻頭上有瘡

生痂痛癢漸漸流引達於兩耳時時目赤頭髮稀疏

腦皮光緊頭大項細肌體羸瘦亦可治也若唇口被

蝕齒斷作五色或盡峭黑舌下有白瘡上齧有竅子

口中時有臭氣齒斷漸染欲爛亦可治也若下部開